

KEMENANGAN KOMUNIS

MEMBAHAYAKAN DEMOKRASI DI INDONESIA

Kesudahan daripada pemilihan umum di Indonesia telah menerbitkan suatu istilah baharu yang dinamakan empat besar (Big Four) iaitu dengan kemenangan-kemenangan yang dimenangi oleh yang pertama Parti Nasionalis, yang kedua Masyumi, yang ketiga Nahdatul ‘Ulama’ dan yang keempat Parti Komunis Indonesia.

(oleh Edrus)

Kemenangan-kemenangan yang telah menjadi perhatian besar di dalam empat besar itu ialah kemenangan Parti Komunis kerana dengan kemenangan itu dengan sendirinya ternyata kepada mata ramai-terutamanya umat Indonesia- bahawa jika sekarang Parti Komunis mendapat nombor satu- dan apabila ia mendapat nombor satu maka kekuasaan akan terletak padanya dan demokrasi yang diagung-agungkan itu sudah tentu akan tamat-tidak ada parti yang akan berkuasa selain daripada Parti Komunis seperti yang dapat dilihat di mana-mana tempat di mana Komunis berkuasa.

Kemenangan Komunis di dalam pemilihan umum di Indonesia ini adalah sangat-sangat disesalkan terutamanya oleh golongan-golongan yang tidak berparti- jangan ditanya lagi pertubuhan yang anti komunis- yang tentu sekali tidak berkenan Parti Komunis berkuasa di Indonesia kelak.

Apakah sebabnya maka di Tenggara Asia yang terbanyak penduduk umat Islam itu Komunis mendapat kejayaan? Inilah satu tanda Tanya kebanyakannya daripada orang-orang kita sekarang.

Menurut punca-punca yang mengikuti pergerakan siasah

di Indonesia kejayaan yang didapati oleh Komunis ialah kerana adanya pemerintahan Ali-Arifin yang lalu di dalam mana selama dua tahun itu Komunis yang memberikan sokongannya kepada pemerintahan Ali-Arifin dapat berleluasa mengorak langkah-langkahnya untuk menyampaikan tujuan-tujuan dalam pemilihan umum. Dengan adanya 27 kerusi Parti Komunis itulah bergantung hidup matinya pemerintahan Ali-Arifin dan dengan kerana itulah pemerintahan itu terpaksa membiarkan apa juar gerak langkah yang dilakukan oleh Komunis untuk keselamatan pemerintahannya- dan daripada masa itulah mereka telah melakukan segala langkah-langkah yang bakal memberi faedah kepada maslahat Komunis- mendesak diadakan pemindahan-pemindahan pegawai, mengadakan tangkapan-tangkapan dan seumpamanya yang dipandang ada berfaedah bagi maslahat mereka dan di dalam masa itulah juga segala ikhtiar-ikhtiar dilakukan dengan bijaksana supaya keadaan rakyat gelisah, kehidupan rakyat terasa sempit, dengan menghidupkan keadaan yang demikian itulah subur jiwa Komunis di kalangan rakyat jelata.

Adapun sebahagian pihak memandang bahawa Masyumi pun ada

juga salahnya di dalam perkara ini. Tatkala membentuk Jemaah Menteri, sesudah Jemaah Menteri Wilopo meletakkan jawatan, Masyumi sepatutnya memberi kerjasama di dalam penubuhan Jemaah Menteri itu dengan meninggalkan perkara-perkara yang tiada mengenai kepada asas-asas yang utama kerana dengan adanya kerjasama Masyumi dengan sendirinya tak dapat menjadikan pengaruh Komunis itu merebak sedemikian rupa. Sepatutnya Masyumi mengorbankan sebahagian besar kehendak-kehendaknya pada masa itu, untuk menyingkirkan bahaya-bahaya yang lebih besar yang sangat-sangat merugikan kepada bangsa Indonesia yang ternyata sekarang bahawa tapak pengaruh Komunis di Indonesia semakin merebak dan kuat.

Juga pendapat ini membidas pula liga Muslimin Indonesia yang memberi sokongan kepada Jemaah Menteri itu dan membiarkan keadaan-keadaan sebegini rupa sehingga Komunis dapat bertapak dengan kuatnya seperti sekarang.

Di dalam lingkungan orang-orang Islam pula memandang bahawa kemenangan Komunis itu adalah terbit daripada akibat gerombolan-gerombolan atau pengacau-pengacau di hutan-hutan dan di kampung-kampung yang menyebabkan sesudah merdeka ini kiyai-kiyai tidak lagi dapat hidup bersama-sama rakyat. Juga kebanyakan kiyai-kiyai itu mengutamakan usahanya sendiri-pergi ke bandar-bandar- tidak betah lagi tinggal di kampung-kampung.

Kehidupan di kampung-kampung itu adalah sangat pahit bagi mereka. Mereka dengan mudah dituduh sebagai pengikut Dar al-Islam kerana terbit daripada keadaan-keadaan yang tak dapat dielakkan ada pula sebahagian daripada murid-muridnya yang menjadi pengikut Dar al-Islam yang sudah tentu sekali sekala datang ziarah kepadanya-dan dengan kerana ziarah itu pihak pemerintah dengan mudah sahaja mendapat sebab untuk menangkap kiyai itu. Dengan keadaan-keadaan yang demikian inilah

banyak kita dengar pemimpin-pemimpin agama di kampung-kampung itu yang ditahan dan ditangkap.

Sebaliknya jika kiyai itu menolak pula kedatangan murid-muridnya itu maka sudah tentulah mereka dipandang pula sebagai alat-alat negara yang menjadi musuh Dar al-Islam – dan keadaannya berbahaya – nyawanya harus terancam atau pun harus pula ia akan diculik (dibawa lari) oleh orang-orang di hutan-mati tak tentu di mana kuburnya.

Jadi kehidupan mereka di tengah-tengah rakyat itu serba salah –terhimpit di antara dua kekuasaan- kekuasaan kerajaan dan kekuasaan orang-orang di hutan yang melawan pemerintah yang terdiri daripada kumpulan Dar al-Islam, bambu runcing, merbabu komplek dan sebagainya.

Dengan keadaan dan desakan yang seumpama inilah mereka itu (kiyai-kiyai) tidak dapat lagi menjadi imam rakyat di kampung-kampung -dan kerana itu anak buah mereka bertaburan di sana sini -dan peluang inilah yang sebaik-baiknya bagi Komunis menghebahkan pengaruhnya untuk mempengaruhi rakyat dengan berbagai-bagai cara dan kaedah, disertai pula dengan perjanjian dan pengakuan-pengakuan sekiranya Komunis menang maka petani-petani di kampung-kampung itu akan dibahagikan tanah-tanah dan diberi kemakmuran yang diharapkan kepada mereka-sedang di dalam pemerintahan mereka membuat langkah-langkah pula untuk menyekat segala-galanya supaya penderitaan rakyat semakin menjadi-jadi.

Hal-hal yang demikian ini telah diinsafi oleh pertubuhan-pertubuhan Islam- dan kerana itulah sesudah pemilihan umum ini pengertian-pengertian baharu timbul untuk mengadakan kerja sama yang rapat di antara pertubuhan-pertubuhan Islam-dan sekiranya Jemaah Menteri Baharu kelak ditubuhkan maka diharap ada kerjasama di antara umat Islam dan Parti Kebangsaan

tidak termasuk Komunis seperti yang disebut oleh

Dr Mohammad Hatta di India baharu-baharu ini.

Sekalipun saudara umat Islam terbanyak daripada lain-lainnya tetapi adanya perpecahan di dalam Islam itulah menjadikan suara itu terbahagi dan tak dapat untuk mereka mengadakan sebuah kerajaan dengan tidak ada campuran daripada parti-parti Kebangsaan yang lainnya. Jadi bolehlah dikatakan bahawa kemenangan itu tidaklah seperti yang dihajat dan dicita-citakan oleh umat Islam.

Mudah-mudahan kejadian yang telah berlalu itu menjadi cermin kepada umat Islam pada masa yang akan datang- dan dapat pula diperhatikan oleh mereka bahawa dengan adanya pemilihan umum di Indonesia itu parti-parti kecil yang mempunyai banyak kerusi di dalam Jemaah Menteri sekarang telah lumpuh sebab tidak mendapat sokongan daripada rakyat.

Baldatun Tayyibatun Warabbun Ghafur

-sambungan dari muka 13

↳ Kemudian dengan sebab apakah negeri itu dibinasakan oleh Allah?

!. Kerana kaum Saba berpaling dari agama Allah.

↳ Sesiapa yang tidak keliru berfikir mungkinkah berkata bahawa negeri subur dan makmur yang dikurniakan oleh Allah itu bukan “Baldatun Tayyibatun” kerana akhirnya binasa?

!. Orang yang berkata demikian, pada pandangan saya, sama dengan orang yang berkata, bahawa Allah berdusta kerana mengatakan “tabiat” akan sesuatu yang “saiah”.

↳ Sekiranya kaum Saba’ tidak lagi membelakangkan seruan Allah, apakah negeri itu dibinasakan?

!. Saya percaya tidak!

↳ Maka bertambah teranglah bahawa “Baldatun” itu tetap “Thayibatun” selama penduduknya berpegang terus kepada agama Allah.

!. Bagaimana kalau seorang meminta negeri yang serupa

negeri Saba’?

↳ Negeri Saba’ itu pada permulaannya “Tayyibatun”, kemudian kerana keinkaran penduduknya, maka jadilah ia “Sia’t”.

Jika seorang meminta sebuah negeri dengan mutlak, maka tentulah ia maksudkan yang baik, demikian juga kalau ia iringi dengan sifat “Tayyibatun”. Hanya Si Bahlullah akan meminta “Sia’t”.

!. “*Baldatun Tayyibatun wa rabbun ghafur*” itu bahasa Arab, tetapi rungkaian itu ada dalam Quran. Maka orang yang ucapkan kalimah-kalimah itu, muhu tak muhu, mestikah dipandang dia ucapkan ayat Quran dan muhu tak muhu mestikah dianggap dia meminta negeri yang sudah binasa seperti negeri kanak-kanak.

↳ Dari tadi soal jawab kita atas dasar bahawa “Baldatun Tayyibatun” itu ayat Quran yang dipermulaannya tidak disebut “firman Allah”.

Sekarang kita akan bahas atas dasar bahasa Arab biasa, dan atas dasar ilmu bilāghah bahasa Arab.

!. Terangkanlah pemakaian kalimah “*Baldatun Tayyibatun*” itu

↳ Kalau seorang pakai rangkaian “*Baldatun Tayyibatun wa Rabbun ghafur*” itu sebagai bahasa Arab biasa, bukan sebagai ayat Quran, maka tidak ada pun undang-undang bahasa yang melarang dia , bahkan maknanya tetap: “Negeri yang baik dan Tuhan pengampun”, Dan tidak perlu ia bongkar tafsir-tafsir tentang kesuburan negeri Saba’ dan kebinasaannya.

!. Jelaskanlah pula pemakaian kalimah-kalimah tersebut menurut undang-undang ilmu balaghah?

↳ Dalam ilmu Badi‘ ada satu undang-undang yang dinamakan “*Iqtibas*” iaitu kita ambil serangkai dari Quran atau dari hadis atau dari syair, lalu kita sisipkan dalam percakapan atau karangan kita dengan tidak menyebut bahawa sisipan itu diambil dari Quran, hadis atau syair.

Dalam undang-undang Iqtibas:

1. Yang diiqtibas boleh berubah sedikit dari asal, yakni, lafaz-lafaznya tidak mesti sama benar-benar dengan yang asal.

2. Yang diiqtibas tidak mesti sama riwayat dan tujuan dengan yang asal.

3. Yang diiqtibas boleh dipakai dengan bebas menurut makna lughah.

1. Satu ayat yang diturunkan bagi satu urusan, bolehkah kita pakai bagi urusan lain, seperti:

*Qālat yā wailatī ‘a’alidu wa ana ‘ajūzun wahadu ba’lī shaīkhan
inna hadū lisha ‘un ‘ajībun – (Hud 72)*

Maksudnya: Ketika Nabi Ibrahim diberi khabar oleh malaikat bahawa ia akan dapat anak, isteri Nabi Ibrahim berkata: “Hairan! Adakah aku boleh beranak pada hal aku seorang perempuan tua dan suamiku ini (pun) seorang tua?! Sesungguhnya ini satu perkara yang aneh!”

Bolehkah kita pakai rangkaian: “Sesungguhnya ini satu perkara yang aneh!” Itu bagi sebarang keanehan yang kita berjumpa walaupun bukan dalam urusan perempuan tua mendapat anak?

⦿. Menurut kaedah usul al-fiqh bahawa:

Al-‘ibrata bī‘umum al-lafaz lā bikhuṣuṣ al-sabab

Ertinya: Yang teranggap itu ialah umumnya lafaz bukan khususnya sebab, yakni, tiap-tiap ayat boleh dipakai menurut keluaran erti lafaznya. Tidak mesti terikat dengan sebab turunnya ayat itu.

Jadi rangkaian “Sesungguhnya ini satu perkara yang aneh?” Boleh kita pakai di mana sahaja ada keanehan.

-dari “Hikmah” Jakarta

Masjid Nabi di Madinah

Kerajaan Saudi Arabia telah membelanjakan kira-kira 20 juta ringgit wang Malaya kerana membesar “Al-Masjid al-Nabawi” di Madinah yang telah pun siap pada bulan yang lalu. Masjid Nabi sekarang telah menjadi lebih dua kali ganda besarnya daripada dahulu dan bersesuaian dengan angka jemaah haji yang makin bertambah dari setahun ke setahun.

Masjid al-Haram di Mekah al-Mukarramah juga sedang diatur hendak diperbesarkan daripada 360,000 kaki persegi kepada 1,020,000 kaki persegi yakni tiga kali ganda. Beberapa buah rumah yang berhampiran dengan masjid itu akan diruntuhkan. Rancangan ini dianggarkan akan memakan belanja sebanyak 30 juta ringgit (dengan kiraan wang Tanah Melayu) termasuk belanja ganti rugi kepada tuan punya rumah-rumah yang akan diruntuhkan itu.

Kitab-kitab Dari Mesir Untuk Kolej Islam

Menurut keterangan Dato’ Syed Ibrahim bin Omar al-Biqaf bahawa pihak muktamar Islam di Mesir telah bermurah hati hendak menghantarkan kitab-kitab agama dan buku-buku pengetahuan Islam ke Tanah Melayu. Sebahagian untuk kutubkhanah Madrasah al-Junid Singapura dan sejumlah besar untuk kutubkhanah Kolej Islam. Kitab-kitab yang dihadiahkan kepada Kolej Islam adalah dianggarkan berharga 3,000 pound atau lebih kurang \$26,000.

Lagi Dua Profesor Dari Mesir

Selain daripada itu dua professor Mesir akan tiba ke Tanah Melayu tidak lama lagi seorang di antaranya akan mengajar di Kolej Islam dan seorang lagi akan mengajar di salah sebuah sekolah agama di Singapura (dipercayai di Madrasah al-Junid al-Islamiyah –P.Q)